

# Hocouh: Banh Ciet Vwnzva Dujyauz Nem Doxdax Dinfwngz Ruzgungz

## 贺州：召开土瑶文化节暨扶贫技能大赛

10 nyied 17 hauh dwg ngoenz ruzgungz, Hocouh Si Bingzgvei Gih banh ciet vwnzva Dujyauz nem doxdax dinfwngz ruzgungz. Swcigih Fulenz, Hocouh Si Dungleanbu, Hocouh Si Minzcunghvej daengj mizgven danh-vei lingjdauj caeuq 30 gya giyez daiqbiuj mbouj dwg goenggya haenx, vunzlai daiqbiuj daengj 500 lai vunz camgya hozdung.

Hozdung aeu “Roengzrengz bang-coh Bingzgvei vutgungz gunggeng Langhyienj dinfwngz baenzfouq Dujyauz” ma guh cawjdaez, haiguh dinfwngz dajsan huqduk Dujyauz, daemj baengz Dujyauz, duk haeux-faengxcax, ngauz laeujgimndaem, langhyienj cazyi vwnzva, doxdax

yaebcaz, yienjheiq caeuq sinhvwnz ingjsiengq daengj baenzdauq doxdax dinfwngz ruzgungz, moix aen hangh-moeg bingzsenj ok 3 boux dinfwngz ndei, fat hawj ngaenziengj caeuq gep baizciengj aeu cazndaem ma guh baenz haenx.

Hozdung ngoenz haenx lij haiguh aen gih neix gyoengq giyez mbouj dwg goenggya haenx caeuq Dujyauz mbanj gungzhoj gapdoiq banggungz nem yienhciengz gienciengz yizsi, yienhciengz gienciengz 15 fanh maenz.

(Vangz Ligenh/黄丽娟)

► Dinfwngz doxdax yienhciengz.



## Beixnuengx Daizvanh Daengz Dasing Yen Haiguh Vwnzva Sonhag Gyauhliuz Hozdung

### 台湾同胞到大新县开展文化教育交流活动

10 nyied 17 hauh, Daizvanh Vahlenz Yen Cozhih Yangh Daibingz Siujyoz Canhfangjdonz 34 boux hagseng lauxsae daengz Dasing Yen Leizbingz Cin Cungsim Siujyoz haiguh vwnzva gyauhliuz hozdung.

Youq ndaw hozdung neix song aen hagdangz hagseng lauxsae caemhdaiz biujyienj vwnzyi cezmu. Gyoengq hagseng Leizbingz Cungsim Siujyoz ndangdaenj buhvaq minzcuz iucingj gyoengq baengzyoux iq Daizvanh Daibingz Siujyoz fwngz rag fwngz itheij diuq foux faexsax angqwt, sing go sing riu it ciengz lien it ciengz, yienhciengz doxangq doxhuz raixcaix.

(Vangz Danhdanh/黄丹丹)



▲ Song aen hagdangz hagseng caez diuq foux faexsax.

## Lozcwngz: 46 Boux Vunzlaux Bakbi Ndaej Gep Baiz “Bouxsouhlaux Bakbi”

### 罗城：46位百岁老人获“百岁寿星”牌匾

10 nyied 17 hauh, dwg ciet gouj nyied cogouj ciet conzdungj Cungguek, Lozcwngz Mulaujcu Swciyen haeujlaeg haiguh “gouj nyied cogouj aen ciet raeuz” cawjdaez hozdung, cujciz gunghcoz yinzyenz bae daengz gak aen yangh cin camnai vunzlaux bakbi, hawj daengx yienh bouxlaux bakbi haenx soengq bae gep baiz “Bouxsouhlaux Bakbi”, mbaw saw cwngsuh mingzdaeuz “Bouxsouhlaux Bakbi” caeuq cien camnai mbatdog hawj 6600 maenz, hoh gyoengqde ngoenzciet angqyangz, ndangcangq souhlaux.

(Mungz Cwnghsw/蒙增师)

## Luzcai: Hohgungzhoj Ciengx Yiengz Vutgungz

### 鹿寨：贫困户养羊脱贫



▲ Hohgungzhoj ciengx yiengz ndaej baenzfouq.

Luzcai Yen Daujgyangh Yangh Vangzniz Cunh Veiz Hanzgij dwg hohgungzhoj, 2016 nienz de ndaej daengz cwngfuj diepsik daigvanj cawx le 60 duz yiengz, aenvih mbouj miz gingniemh, mbouj daengz buenq bi couh dai bae 30 duz yiengz. Dangdieg cuzmuz souyih bumwnz itseiz hix mbouj miz maz banhfap bang de. Veiz Hanzgij mbouj deq mbouj baengh, de couh gag bae daengz dieg ciengx yiengz Hozciz cimh canghyw aeu yw, lij lienzhaeh daengz souyih Swconh hawj yiengz ywbingh, doeklaeng couh ndaej bauj gyoengq yiengz neix lo. 2017 nienz ndwencieng de gai le 22 duz yiengz saedyienh le vutgungz. Bineix gij yiengz de gaenq sanj daengz 150 duz, gujsuenq bineix ciengx yiengz souhaeuj mauhgvaq 7 fanh maenz. (Lai Genveih/赖建辉)